

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1461 del 28/05/2025

Ägenump dar Euregio Ticket vor di öffentleschen lânt trasporte, ma bart åhevan von kristmånat 2025. Kompatscher, Fugatti un Mattle: “Gian übar di grentzan ankunto a mobilitét boma mage auhalten”

Euregio, viazarn a djar åna grentzan in Tiról, Südtiról un Trentino

[Cimbroy] Viazarn in Tiról, Südtiról un Trentino pinn treno, bus, kublpån vor a gântzez djar pittnan uantzegen zettl: dar Euregio Ticket bart palle a realtét.

Da hãnz gemacht bizzan dar vorsitzar von Euregio un vodar autonome Provìntz vo Poatzan Arno Kompatscher pittnãndar pinn vorsitzar vodar autonome Provìntz vo Tria Maurizio Fugatti un pinn hauplãntsmãnn von Tiról Anton Mattle an ende vodar Djunta un vodar versãmmelung von Euregio Tiról-Südtiról-Trentino bodase iz gehaltet atz 21 von madjo atz San Martìn in Gardental (BZ).

Nã dar delibera ågenump vodar Djunta von GECT , dar Euregio Ticket bart varlérn vor 12 månät sidar in tage bodar iz khent gekhoaft. Alle di pürgar von Tiról, von Südtiról un von Trentino bartn mang khoavan disan zettl åna zo halta kunt vodar eltom un bartn mang nützan di öffentleschen trasporte in gantz Euregio.

Dar zettl bart khostn 750 euro. “Ditza bill soìn gemuant ke dar bart soìn in 50% bõlvrar baz di drai uantze zettln vor a djar vor Tiról, Südtiról odar Trentino gelekk pittnãndar – asó hatta khött dar vorsitzar von Euregio Kompatscher – Dar Euregio asó geat an åndra bõtta übar di grentzan un macht no an åndarn tritt zo giana hërta nemprar in pürgar, zo kooperara un zo geba mearar vèrt in Euregio sèlbart gianante no vürsnar zuar an européan integratziong”.

“Ditza iz a bichtegez zil boda iz starch gehöart in Trentino o, übarhaup von djungen: soìn gest guat zo lega pittnãndr di öffentleschen sistèm von trasporte un hãm gearbatet vor a baila afte aministratìf struktùrn hattaz zuargètt zo macha pazzan di tariffe vo aniaglana redjong pittar åndarn” asó hatta khött dar vorsitzar vodar autonome Provìntz vo Tria Maurizio Fugatti khödante o vorgèllzgott in Kompatscher un in Mattle gedenkhante in da gelaichege zait bia ma sait gelãnk zo risòlvra mearare problème:

“Balma redet vo sachandarn konkrète, soìn guat zo giana übar in tèkneschen spèrrn zoaget bia dar Euregio hatt lust zo stiana nãmp in pürgar von ünsarn lentar un gemen eppaz mearar boda åndre nèt hãm” hattar no khött darzuar dar vorsitzar.

Dar hauplãntsmãnn von Tiról Mattle izzese o khött sichar ke dar naüge djarege abonamént saibe nützlich vor berdase mövart vil un vil vert nütztz di öffentleschen trasporte vo alln drai in lentar von euregio: Bar khön hoatar ke bar bõlln a mobilitét boda mage khemmen augehaltet”.

’Z soinda no sachandarn boda mochan khemmen auzgemacht, azpe bo ma mage gian zo khoava dise zettln un asó bartma no mochan eppaz paitn vorma mage åhevan. Di vorsitzar in da press konferentz bodase iz gehaltet dòpo in trèff von spitz organe in Gardental hãm khött ke dar Euregio un di vüarom boda drinn soìn haltn kunt zo maga auzgem di zettln balda bart bèksln dar orario von trasporte in kristmånat 2025.

Dar Euregio Ticket iz drinn in arbat progrãmm vodar südtirólar vorsitzarung von Euregio 2023-2025

Dar untar di dianst.

Tiról

- Da gântz nêtz VVT (Verkehrsverbund Tirol)
- Di trêne vor lãnge viazan ÖBB in Tiról: Railjet, Railjet Express, Intercity-Express, Intercity, EuroCity.

Südtiról

- Dar gântz sistèm vodar nêtz "altoadigemobilità"
- Redjonàl trêne eksprèss vo Trenitalia
- khummane trêne vor lãnge viazan azpe: Freccia, Italo, EC, Intercity, Railjet

Trentino

- dianst in di statt un auz vodar statt vo Trentino Trasporti S.p.A.
- aisanpānen:
Trento - Malè-Marilleva–Mezzana
aizanpān Valsugana: Trento–Primolano
von Prennar sin atz Borghetto
Kublpān Trento-Sardagna
- Redjonàl un redjonàl èkspress trene vo Trenitalia
- khummane trêne vor lãnge viazan azpe in Südtiról: Freccia, Italo, EC, Intercity, Railjet

Dòpo azta soìn khent augelekk di püñkt boma mage khoavan di zettln barta khemmen augelekk o an arbat khnopf boda bart mochan schètzan bia 'z soìnse vürgestèllt di laüt dòpo a djar.

Foto un pildar von Euregio

Downolad pildar un intervista in vorsitzar Fugatti [da](#)

Übarsetzt von Schaltarle vor di zung von Toalkamou vodar Zimbar Hoachebene

(us)